

En pia memoria da

Clau Antoni Beer-Paly, Sedrun

(Corr.) Ils 6 d.q., la sera, ha il zenn da miert annunziau la mort de Clau Antoni fravi, sco el vegneva numnaus dalla entira vischerna. Ins saveva bein che ei mava in tec alla gada da rendiu cul Clau. Cun ina aulta vegliadetgna de biabein 78 onns ha el giu pigliau malcostas aunc avon dus meins. E daven da lu ha quella maligna malsogna mudergiau il Clau entochen sia mort. E nus lein sespruar cun quest necrolog de dar ina egliada sur della veta de nies preziau defunct.

Il Clau Antoni ei naschius a Sedrun ils 6 da fenadur 1899, e quei sco siatavel affon d'ina numerusa e gronda famiglia da 14 affons, dils geniturs Gion Bistgaun Beer e Maria Doratea, nata Huonder. Ina gronda famiglia, nua che ei era pign gudogn da gliez temps. Sche nus dein ina pintga egliada ella cronica della famiglia Beer fravi, sche vesein era che il bab dil Clau fuva fravi, e che quella famiglia de fravi exista già dapi dils anno 1770. Bein ina gronda raritat, igl onn 1919, ha il Clau finiu siu emprendissadi sco fravi, ch'el ha giu fatg tier siu bab. Da gliez temps era ei dus fravis en Tujetsch.

Il Clau Antoni era in tut special bien fravi. El possedeva specials duns per quei mistregn. Quei che il Clau Antoni saveva buca far, gliez duvrava in auter nuota empruar. Ils emprems fiars sin las rodas dils carri ha era nies preziau defunct giu enferrau. Insumma fuva el el ver senn dil plaid in artist de professiun. Nus savein aunc oz veser sias bialas lavurs artisticas de fravi che il Clau Antoni ha fatg en nossa biala baselgia parochiala ed ella caplutta de s. Leci a Cavorgia. Quei dat perdetga avunda tgei capacitat che el possedeva. Deva ei zatgei de studegiar, co menar atras, sche mavan ins semplamein tier il Clau fravi. Ina notg durmir e lura anflava el segir il giavischau, e quei per cumpleina cumentientscha dalla lavur surdada ad el.

Il Clau Antoni ei adina staus in um de gronda religiusedad e tema de Diu ed ha era adina giu la devisa: «ura e lavura,



sche gida Dieus Tei lura». El era adina promts, sch'ei retractava de far in survetsch al concarstgaun, malgrad tut sia lavur. Ed aschia ha el era aunc giu temps de far caluster, e quei buca meins che 8 onns. Bein capiui che ei era da gliez temps buca tuchiez electric. Ed ins astga bein era dir, sco il plevon da Sedrun ha giu detg en siu bi plaid de bara, che il Clau seigi levaus per tuccar de stizzar tschiens e tschiens gadas.

Ils anno 1929 anfla quei capavel misterigner ina capavla giuvna ella persuna ded Anna Maria Paly, da Sumvitg. Ed ord quella lètg eisi sortiu 11 affons, 5 buobs e 6 buobas. Bein ina gronda e biala famiglia, dalla quala il Clau Antoni haveva la detga luschezia. Era ei la Anna Maria stada ina buna mumma e consorta per il Clau Antoni. Ella ha giu grond quitaus per siu consort entochen sia mort. Bien Clau Antoni, Ti has finiu sin quest mund e sas ussa guder la perpetna pagaglia enta parvis per fut Tias stentas e quitaus per ils Tes cars. Als restai anavos nossa pli intima condolenza e la glisch perpetna sclareschi ad el ed a tuts nos cars defuncts. RIP G.F.